

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

**DARIPADA : TUAN TAN KOK WAI
[CHERAS]**

TARIKH : 2 APRIL 2014 (RABU)

SOALAN :

Tuan Tan Kok Wai [Cheras] minta **MENTERI PEMBANGUNAN WANITA, KELUARGA DAN MASYARAKAT** menyatakan sama ada satu rang undang-undang diskriminasi 'disabiliti' akan digubal bagi mempromosikan dan melindungi hak golongan yang berupa OKU. Jika tidak, mengapa. Nyatakan jumlah aduan daripada OKU sejak 3 tahun lepas untuk layanan yang sama rata dan akses pada pekerjaan, perumahan, pengangkutan dan di bidang perkhidmatan swasta dan kerajaan.

JAWAPAN:

Tuan Yang di-Pertua,

Kerajaan amat komited dalam memperjuangkan dan melindungi hak dan kepentingan golongan orang kurang upaya (OKU) dalam semua aspek kehidupan agar mereka dapat menjalani kehidupan bermaruah dan inklusif dalam masyarakat, sama seperti anggota masyarakat yang lain.

Dari segi perundangan, kerajaan telah menggubal Akta OKU 2008 [Akta 685] bagi memastikan hak, kepentingan dan kesejahteraan golongan OKU sentiasa terpelihara. Akta ini yang mula berkuat kuasa pada 7 Julai 2008 merupakan satu akta yang mengadakan peruntukan bagi pendaftaran, perlindungan, rehabilitasi, pembangunan dan kesejahteraan OKU, penubuhan Majlis Kebangsaan Bagi OKU dan perkara-perkara yang berkaitan dengannya. Akta ini menjadi asas dalam membantu OKU menjalani kehidupan yang lebih sempurna dalam arus perdana masyarakat serta bersama-sama menyumbang dalam pembangunan negara.

Secara amnya, Akta OKU 2008 telah digubal dengan mengambil kira keperluan-keperluan di bawah Konvensyen Mengenai Hak OKU yang telah diratifikasi oleh negara pada 19 Julai 2010.

Konvensyen ini merupakan konvensyen hak asasi manusia komprehensif yang pertama dalam milenium ini yang membolehkan golongan OKU menikmati kesaksamaan hak dan peluang serta penyertaan penuh dan efektif dalam masyarakat, sama seperti anggota masyarakat yang lain. Selaku negara pihak, Malaysia bertanggungjawab untuk melaksanakan komitmen dan obligasi di bawah Konvensyen ini. Ini termasuk aspek-aspek kehidupan seperti aksesibiliti, mobiliti, kesihatan, pendidikan, pekerjaan, pemulihan, kesamarataan, penyertaan dalam bidang politik, ekonomi dan sosiobudaya serta tiada diskriminasi.

Tuan Yang di-Pertua,

Selain Akta OKU 2008 dan Konvensyen Mengenai Hak OKU, kerajaan juga telah menggubal Dasar dan Pelan Tindakan OKU yang bertujuan memberi kesaksamaan hak dan peluang, di samping menghapuskan diskriminasi terhadap OKU bagi membolehkan penyertaan penuh dan

efektif mereka dalam masyarakat. Dasar ini turut mengutamakan nilai hak kemanusiaan seperti kemuliaan, kehormatan dan kebebasan bagi membolehkan OKU hidup berdikari.

Berdasarkan huraian yang diberikan, Kementerian Pembangunan Wanita, Keluarga dan Masyarakat berpandangan bahawa pada masa ini tiada keperluan untuk menggubal akta khusus mengenai diskriminasi terhadap OKU memandangkan isu diskriminasi tersebut telah pun diambil kira dalam perundangan negara sedia ada.

Selain itu, Artikel 8 Perlembagaan Persekutuan turut memperuntukkan bahawa "semua orang" adalah sama rata di sisi undang-undang dan berhak mendapat perlindungan yang sama rata di sisi undang-undang tanpa sebarang diskriminasi. "Semua orang" dalam konteks ini adalah termasuk golongan OKU. Sehubungan itu, hak dan kebebasan ini telah dijamin oleh Perlembagaan Persekutuan dalam konteksnya sendiri.

Tuan Yang di-Pertua,

Mengenai jumlah aduan yang diterima daripada OKU sejak 3 tahun yang lepas, adalah dimaklumkan bahawa berdasarkan laporan yang diterima oleh Kementerian Pembangunan Wanita, Keluarga dan Masyarakat melalui Talian Nur 15999, secara keseluruhannya sebanyak 822 aduan telah diterima yang melibatkan perkhidmatan yang disediakan oleh pihak Kementerian dan juga agensi di bawahnya bagi tempoh 1 Januari 2011 hingga 31 Disember 2013. Berdasarkan laporan, kebanyakan aduan yang diterima oleh pihak Kementerian melalui Talian Nur tersebut adalah berkenaan pendaftaran OKU, kemudahan dan juga perkhidmatan institusi untuk OKU seperti Bengkel Terlindung dan juga Program Pemulihan Dalam Komuniti (PDK). Laporan terperinci mengenai aduan yang diterima melalui Talian Nur 15999 akan dikemukakan kepada Yang Berhormat secara bertulis.

LAMPIRAN

**JUMLAH KES BERKAITAN OKU YANG DIRUJUK KE JABATAN
PEMBANGUNAN OKU, JABATAN KEBAJIKAN MASYARAKAT
(JPOKU, JKM)
(1 JANUARI 2011 – 31 DISEMBER 2013)**

AGENSI YANG DIRUJUK	KATEGORI	SUB-KATEGORI	JUMLAH
JPOKU, JKM	Aduan	Program	3
		Pendaftaran OKU	121
		Perkhidmatan	4
		Pelbagai	1
	Lain-lain	Pelbagai	1
JUMLAH:			130

Sumber: Talian Nur 15999, Bahagian Pengurusan Maklumat,
Kementerian Pembangunan Wanita, Keluarga dan Masyarakat